

en Ionie. Strabo aussi dit les Smyrnees auoir eu vne sorte de monnoye de cuiure, qu'ils appelloyent Homeres, du nom & portrait du poëte Homere: lequel ils disoyent auoir esté nay à Smyrne.

*Des Statues anciennement erigees par les Romains.*

CHAP. XI.



ENCORE conuient-il parler dauantage des Statues, qui ont esté tant communes & tant celebres aux Romains, voire iusques à les mettre en euidence és medalles, qui nous restét encore pour le iourd'hui: comme ainsi soit que les mesmes Statues soyent totalement demolies & ruinees pour le present. En ma medalle d'argent de Marcus Æmilius Lepidus, se voit au reuers la statue equestre sur vn pont, à luy dediee, pource qu'estant Preteur à Rome, il repara le pont Sublice (qui n'estoit que de bois) & le fit de pierre, & de son nom fut nommé, Le pont Emilie. En vne medalle d'argent d'Augustus Cesar, se voit au reuers vne Statue equestre sur vne base quarrée: c'est vn homme à cheual, portant trophées en sa main dextre. Autre medalle du mesme Auguste Cesar, a pour reuers vn homme sur vn cheual, ayant les deux pieds de deuant en l'air, avec l'inscription, *Populi iussu*, qui est à dire, que par commandement du peuple, telle statue equestre luy auoit esté dressée à Rome. Il s'est trouué autre medalle d'argent, à sçauoir, vn denier Romain de Marcus Varro, lors qu'il fut legat, & Proquesteur à Pompeius Magnus, és guerres contre les Pirates ou larrons de mer, & contre le Roy Mithridates: auquel denier se voit le viaire du Roy Numa Pompilius, constituant le haut & dessus d'vn Terme, dont sera parlé cy apres. Ces medalles, & plusieurs autres semblables, sont encore en estre pour le iourd'hui: estans abbatues & abolies les Statues, representees par icelles medalles. Suetone escrit, qu'iceluy Augustus fit fondre de son viuant plusieurs Statues d'argent, qui luy auoyent esté voïees & dediees, tant par plusieurs & diuerses prouinces, que par ses amis & ceux qui luy vouloyent bien. Dion dit qu'il en fit faire medalles & monnoyes. De cecy est apparent, que par les medalles ont esté quelquefois remarquees & mises en euidence les Statues: & pource est raisonnable d'en parler aucunement en cest endroit, attendu mesmement qu'il sert beaucoup à l'intelligence de plusieurs parties de l'histoire Romaine, laquelle nous delurons illustrer de tout nostre pouuoir. Que

*Smyrne fut  
le port de l'Asie  
par lequel on  
portoit les  
statues d'argent.*